

Te Heheuraa Api

E ITE ʻIA OUTOU I TE PARAU MAU, E NA TE PARAU MAU OUTOU E FAATIAMA

TE VEʻA A TE EKALESIA A IESU MESIA I TE FEIA MOʻA
I TE MAU MAHANA HOPEA NEI

NENEIHA I PAPEETE, TAHITI, I TE MAU AVAʻE ATOA

Te hoo: E 30 farane i te matahiti.

Nº 2.

-- FEBUARE 1951 --

MAT. 38.

Ua Faahanahanahia te Peropheta Ra O IOSEPHA SEMITA I Nia Aʻe I Te Mau Taata Atoa.

NO te faahoʻiraahia mai o te Evanelia, i roto i teie tau tuuraa hopea no te ʻiraa o te mau tau, ua aitarahu to te ao nei ia Iosepha SEMITA no te reira, e te vahi maere aita oia e hinaaro nei i te aufau atu i te reira. Noaʻtura i te reira, e aufahia ihoo te reira ia tae mai te mahana e piʻo ai te mau turi atoa e a faaite mai ai te mau vaha atoa e, o te Tamaiti Fanau tahi mau â o Iesu Mesia na te Atua.

Tei roto i te mana o te mau taata maramarama atoa te ite e, i te mau tau i muri aʻe i te mau aposetolo tahito ra ua tupu te hoê mairiraa, oia hoi, te hoê taivaraa no ô mai i te mau haapiiraa, e te mau peu hoi o te Ekalesia Matamua ra. Te faaite mai nei te parau tuatapapa e, te Autahuʻaraa, tei faatiahia e to tatou Faaora, ua faahuru ê hia ʻia e ua faatupuhia te tahi mau toroʻa apî, i roto i te reira, tei ore roa i itehia i te mau mahana o te mau aposetolo, e tei ore roa hoi i au i te Ekalesia mau a Iesu Mesia ra.

Ua faaorehia te tahi mau toro'a, tei faatiahia e te Faaora iho, no te mea ua tupu te mana'o hape e, aita to ratou e faa-faa faahou. Ua faaorehia te mau Aposetolo e te mau Peropheta, te mau toro'a te reira ta Paulo i parau ra, ia vai noa te reira i roto i te Ekalesia *e tae noa'tu te tau ia riro tatou a-toa nei ei taata paari, i te faaroo ho'e e te ite ho'e i te Tamaiti a te Atua, ia taea te faito ra i te i o te Mesia i te rahi.*

No te oreraa o te mau Aposetolo, e te mau Peropheta, ore atoa'tura te mau heheuraa, oia hoi, te mau farereiraa i to te ra'i ra, no reira parauhia'tura e, ua navai noa te mau papai-raa mo'a ra. Anoihia'tura te mau parau mau maramarama o te Evanelia i te mau haapiiraa paari o te etene o te reira tau e aita'tura te Evanelia i au faahou i tei haapiihia, e tei haapaohia hoi e te mau Aposetolo a te Fatu. Ua ite-noa-hia te reira huru e te mau feia haapii parau paari tei paheru i te parau i roto i te tuatapaparaa parau no te mau tau matamua o te faatereraa Cherisetiano ra.

Aita roa te patoiraa a te Porotetani i faa afaro rii noa a te i te reira hape no te mea, te feia tei faarue e atu i te *ekalesia metua ra*, ua tamau noa ratou i te haaparareraa i te reira mau ino, e no reira ua tamau noa hia te haaparareraa i te reira mau haapiiraa e te reira mau peu hape e te mau amuiraa *porotetani ra*. Mo'e atura te ite no nia i te huru mau o te Atua e te auraa mau e vai i rotopu i te Metua e te Tamaiti, e i muri iho i te tau no Totatine ua monohia te reira i te haapiiraa taa ore no nia i te Atuaraa. No reira tupu atura te taa ore no nia i to tatou Metua Mure ore e ta'na Tamaiti o Iesu Mesia, e ua vai tamau noa te reira huru, i roto i te ao Cherisetiano e tae roa mai i teie nei mahana.

E mea tia roa ia porohia'tu, e ia fariihia mai, e to te manunaa atoa o te ao nei, te taeraa mai o te Metua, e te Tamaiti, i te Peropheta ra ia Iosepha Semita i te haamataraa o te matahiti 1820 ra, area râ, no to ratou pouri ua patoihia te

reira haapiiraa noa'tu i to'na maramarama e to'na tano mai-tai i te mau parau i papaihia i roto i te buka mo'a, no te mea na au a'e na te taata ia tamau noa i roto i te tiaturiraa ta te piri pae varua i faatae mai i nia ia ratou ra.

Ua pinepine to'u feruriraa no nia i te reira orama e ua mae-re au no te aha te Metua e te Tamaiti i haere mai ai, raua toopiti, ia Iosepha Semita. Te vai ra te mau tumu e rave rahi. E teie te hoê tumu rahi, oia hoi, te riroraa te haapiiraa, no nia i te Atuaraa, ei parau fifi roa na to te ao nei na roto i te haapiiraa hape e, ua riro te Metua, te Tamaiti e te Varua Maitai ei varua hoê e te huru hoê, tei parare na roto i te reva ma te tino ore e te melo ore atoa hoi, no reira ia tupu ihoa te reira faaiteraa no te faaoreraa i te ino. Na roto i te reira mau haapiiraa ua riro to tatou Faaora ei metua no'na iho na roto i te hoê ravea miterio te ore roa e tia to'na haro'araraa.

Na te fâraa mai o te Metua e te Tamaiti, i roto i to raua na tino i'oa e te ivi ra, i haaparari i te reira parau maamaa tei haamaamaa i to te ao nei no na matahiti e hoê tauatini e e pae hanere ra.

I muri a'e i te taivaraa i te mau haapiiraa e i te mau peu a te Ekalesia a Iesu Mesia no te Feia Mo'a no te mau mahana matamua ra, e mea tia mau ihoa ia iriti faahou-hia-mai te ra'i ia tia i te Fatu ia parau-faahou-mai, e ia na roto i to'na iho vaha, e te vaha a to'na mau tavini tahito ra te faaho'iraa mai i te parau mau tei mo'e ra. I te tupuraa o te taivaraa ua rave-ê-hia'tu, no nia i te fenua nei, te mana no te raveraa i te ohipa na roto i te i'oa o te Fatu, e mai ta Ioane ite, i roto i ta'na orama ra, ua rave-faahou-hia'tu te Autahu'araa i te Atua ra a haere atu ai te Ekalesia a Iesu Mesia i roto i te medebara.

No reira hoê noa iho ia ravea e vaira no te faaho'iraa mai i te reira Autahu'araa i te taata nei, maori râ na roto i te i-

riti-faahou-raa o te ra'i. Ua faatupuhia te reira na roto i te Ioane Bapetizo haereraa mai, na mua, e te mau taviri atoa o te Autahu'araa a Aarona, e i muri iho tae maira o Petoro, o Iakobo e o Ioane e te mau taviri atoa o te Autahu'araa a Melehizedeka e ua horoahia mai, te reira mau mana atoa, ia Iosepha Semita raua o Olive Cowdery.

E mana'o hape roa, teie e vai nei i teie mau mahana, te na ô e, e tia noa i te taata ia rave i te mana, i nia ia ratou iho, no te parauraa e te raveraa i te ohipa na roto i te i'oa o Iesu Mesia a ore ai ratou i maitihia'i no te reira ohipa e te Atua. Aita roa te mana, tei horoahia e to tatou Fatu, i ta'na mau pīpī, ua fatata e piti tauatini matahiti i mairi a'e nei, e faatia nei i te hoê noa a'e taata ia rave i te mau oro'a o te Evanelia, e a ore râ, ia a'o atu e ia haapii atu na roto i te mana o te Atua ra. Aita te Bibilia e horoa nei, e aita hoi to'na e mana no te horoaraa, i te tahi noa'tu taata, te mana ia rave i te mau toro'a no te Autahu'araa. E tae noa mai te reira mai i te tau tahito roa ra, na roto mai i te mana no ô mai i te Tamaiti a te Atua, e a ore râ, i tei maiti-mau-hia e ana ra.

Ua iti roa te mau taata, i rotopu i te mau tavini o te Fatu mai te haamataraa o te mau tau, tei faaturahia mai ia Iosepha Semita. Aita roa vau i ite i te tahi atu taima i fâ mai i te Metua e te Tamaiti i te taima hoê i te tahi atu peropheta i te tahi atu tau tuuraa Evanelia. Ua maitihia o Iosepha Semita ia riro ei upoo no te tuuraa evanelia rahi roa a'e tei re-vehia mai te tau i tuuhia mai ai'o Adamu i nia i te fenua nei. Ua maitihia oia no te reira ohipa hou to'na fanauraahia mai mai ia Ieremia e te tahi atu â mau peropheta. Ua tohu o Iosepha, te tamaiti a Iseraela, no'na e no te ohipa rahi te tita-hia ia'na ia rave. Ua papaihia te reira parau i nia i te mau apī veo, tei vai i roto i te rima o Lehi, e tei na ô mai:

Oia ia, ua na ô maira Iosepha, Te na ô maira te Fatu ia'na ra e: E faatupu vau i te hoê hi'o maitai no roto mai i to tatou

upu, e e mana'o-maitai-hia oia i rotopu i te huaai o to oe ra tauupu. E na'u oia e faaue atu ia rave oia i te tahi ohipa no te huaai o to oe tauupu, no to'na ra mau taeae; e e riro te reira ei faufaa rahi no ratou, i te faaiteraa' tu ia ratou i te mau faufaa ta'u i fafau i to mau metua ra.

E e faaue atu vau ia'na e, eiaha oia e rave i te tahi atu â ohipa, maori râ o ta'u e faaue atu ia'na. E faarahi hoi au ia'na i to'u ra mata, no te mea e rave oia i te ohipa na'u ra. (II Nephi 3:7-8)

E mea papu atura o Iosepha Semita ihoa te hoê o te mau taata rahi ta Aberahama i parau e, e faarirohia ratou ei faatere e te Fatu. Aita â to'na rahiraa i taa-maitai-hia. Aita â i haro'aro'a-maitai-hia e tatou te mau ati e te mau peapea tei farereiha e ana ra, e aita â i taa maitai ia tatou te itoitoe e te faaoromai tei faaitetia e ana, i roto i te reira mau tamataraa e tae noa'tu i te hopea.

Ua amo oia, ma te itoitoe mau e ma te faaoromai rahi, te teimaha o te ohipa rahi tei tuuhia i nia ia'na i roto i te hoê tau peapea mau. Ua rahi oia mai ia Mose ra, o te parau ia a te Fatu, e ua titiro oia i ta'na parau faaite i to'na iho toto.

Iosepha Fielding Semita

TE OHIPA A TE VAHINE

(E tuatiraa teie parau)

E teie nei, nahea te reira e oti ai? Mai ta'u i faaite a'enei, na faatano vau i ta'u parau tumu i te haapiiraa tei noaa mai ia'u, i to'u oraraa nei, na roto i to'u farereiraa i te mau vahine maitatai. No reira, teie ta'u parau matamua, e au mau tuahine, a patoi atu, na roto i te mau ravea atoa, te feruriraa hape, tei haere noa i te rahiraa, tei na ô e, aita e peapea

ia parahi hoê te tane e te vahine hou te faaipoiporaa. O ta
tatou mau tamahine te riro ei mau metua vahine i teie mau
tau i mua nei, no riera e mea tia roa ia ite ratou e, e haava-
re te parau ra e, e ere i te hara te apa-noa-raa. Te parau atu
nei au, e hara te reira. No ô mai, no te ememi mai te reira
mau haapiiraa no te faaoreraa i te oaoa mau; e mau haapiiraa
te reira na Satane iho. Ua ite ihoa te mau vahine apî paiet
mau, tei tia i te hanahana mau o te metua-vahine-raa, te im
mau o te reira mau haapiiraa e te reira mau peu. E na reira
atoa te tane apî te faatura i te metua-tane-raa e tei vai, i ro-
to i to'na mafatu, te hoê vahi faaturaraa i te metua vahine,
ô te taata nei, no te mau tau i mua ra. Tei roto i te viir
ore te vairaa te niu papu no te paturaa i te oaoa mau i roto
te faaipoiporaa.

Teie te piti o ta'u parau, a tamau noa i te tuuraa i to ou
tou atoa ra puai i roto i te haapiiraa'tu e, ua faatiahia te faa-
ipoiporaa ei ravea no te faatupuraa i te utuafare e te fanau
raa hoi i te tamarii. O te ravea maitai roa ra te reira no te faa-
iteraa i te here mau. Ei tuatiraa i te reira parau te hinaaro
nei au i te tai'o atu i te hoê rata tei papaihia e te hoê vahine
ne faaipoipo apî, huru nevaneva, tei faai'e mai i te huru o
raraa te ore roa e au ia ferurihia e te mau tamahine apî no
te Feia Mo'a no te Mau Mahana Hopea Nei. I roto i te reira
rata te faaitera oia i to'na oaoa. E pae matahiti i pau mau
to'na faaipoiporaahia. Ua *maamaahia* raua e ta'na tane i
raua iho. Te haere noa nei raua i te vahi faaheeraa i nia i te
pape toetoe, i te oriraa, i te teata, i te mau vahi faatairaa
e i te mau vahi arearea ra; ua hoo atoa mai raua i te hoê fa-
re maitai tei faaihia i te mau taihaa nehenehe. E ohipa maitai
tai ta'na tei aufau-maitai-hia e e ohipa maitai atoa ta ta'na
tane. Teie te tahi parau ta'na i papai: *I teie nei aita mau
e hinaaro nei i te tamarii, e o te reira ihoa ia. Ua taa ia mau
e, e riro te tamarii mai te hoê taata êê i roto i te reira ao i
maitai roa ra tei riro na maua iho ana'e.*

Te huru haama rii nei au no to'u tai'oraa'tu i te reira rata ia outou, e tau mau tuahine, area ra te hinaaro nei au ia ite outou i te tahi pae o te pahonoraa, tei tuuhia'tu ia'na e te taata papai ve'a, tei na ô e:

E tia noa paha ia oe ia faahapa i te ture Natura i to oe na apîraa ma te peapea ore, eiaha ra oe e peapea, te rave noa nei oia i ta'na tufaa. Te pau noa nei te mau vahine tei haapao noa ia ratou e ta ratou ra mau tane. E mo'e ê to ratou nehenehe to ratou i'ei'e e to ratou anaanata'e i roto i te oraraa nei. Noa'tu i te tahi taime e hi'oraa nehenehe to to ratou mata aita ra e ora i roto i te reira. A tiaturi mai oe, e a ore râ aita, e riro ê atu ta ratou mau tane no te mea e noaa ia ratou te iteraa e, te ore nei ta ratou mau vahine i te horoa mai i te hoê mea toi faataahia e te Natura.

I te tahi atu pae, e noaa i tei mauui rii e tei horoa i te tusia te nehenehe no te oaoa mau ra te faariro i te vahine noa ra ei mea au maitaai ia hi'o—te nehenehe maere mau no te ohipa i oti. E taua here ra ta outou e tamata noa nei i te tapea—eita e noaa te feruriraa ia outou no nia i te rahiraa o te reira i roto i te reira haru. E haere noa te reira i te rahiraa, te puaira e te mure-ore-raa i te taime e horoa mai ai te vahine faaipoipo i te hoê tamarii na ta'na tane faaipoipo.

E mea hanahana te riroraa ei vahine, area râ e teitei roa'tu hoi te metua vahineraa. Te vai nei te tahi mau vahine te ore roa e tia ia riro ei metua vahine; area râ tei tia ia na reireira e tei rave i te peu a teie nei vahine apî ra, e riro ia ratou ei hi'oraa ino no to ratou pūpū.

Teie te toru o ta'u parau, e au mau tuahine, ia tuu outou i to outou puai no te faarahiraa i te haapaoraa faaroo i roto i to outou mau utuafare. Ia vai mau â te ite, i roto i te mau utuafare o te Feia Mo'a no te Mau Mahana Hopea Nei e, e melo mau tatou no te utuafare. Teie te parau ta te hoê taata, tei manuia roa, i papai i te tahi tau:

I muri a'e i to'u faaipoiporaa haere maira to'u metua tane e farerei ia'u i roto i to'u iho fare e ua hi'o noa oia e ati noa a'e. Ua haa mataitai au ia'na i te mau piha atoa o te fare ra, e i reira na ô maira oia ia'u, i roto i to'na ra reo teiaha, *Oia mau, e mea nehenehe roa, tera râ eita te hoê taata e ite, ia haere oia na roto i teie fare, e no vai oe, no te Atua anei, e a ore râ,*

no te tiaporo anei. Haere faahou atura vau na roto i te mau piha atoa ma te hi'o maitai e, inaha, mana'o ihora vau, ua tano oia.

E haapiiraa mau te reira. E mea tia ihoa ia farerei te mau tamarii o te haere ra i te paariraa i te mau mea no te pae o te haapaoraa faaroo. E teie nei te ani atu nei au ia outou, te vai nei anei, i roto i to outou mau fare, te mau buka haapiiraa na te Ekalesia, ia tia i te mau tamarii te haere i te Paraimere, te Haapiiraa Sabati e i te mau Putuputuraa a te Feia Apî, ia tai'o i te reira i te taime hinaarohia ra? Te vai nei anei ta outou irava parau, e a ore râ, te hoê o te mau parau a te Fatu i roto i te piha o te mau tamarii? Te maere nei au mai te mea te vai ra ta outou hoho'a o te Faaora i te taurauraa i roto i te piha o ta outou mau tamarii? Na te reira mau mea rii e tuu mai i te varua haapaoraa faaroo i roto i te utuafare. No reira o Patrick Henry i faarahi ai i te parau no te haapaoraa faaroo a papai ai oia e:

I teie nei na oti ta'u opereraa faufaa i rotopu i ta'u mau tamarii. Teie ia te mea ta'u e hinaaro nei i te horoa na ratou, oia hoi, te hoê haapaoraa faaroo Cherisetiano mau. Mai te mea te vai ra te reira ia ratou, e aita te reira ia'u, a horoa'tu ai au i te hoê noa iho pene na ratou e riro ia ratou ei feia faufaa rahi mau. Mai te mea ra aita te reira ia ratou a horoa noa'tu ai au i te taatoaraa o te ao nei na ratou, na riro atura ia ratou ei feia veve mau.

Te poia nei ta tatou mau tamarii i te faaroo mau, e aita'tu hoi e vahi maitai a'e, maori ra te utuafare, no te tuuraa'tu i te reira i roto i to ratou mau mafatu. Mai ta to tatou tuahine ra o Spafford i parau a'enei, te haaputu faahou nei te mau ata pouri o te hoê tama'i apî i nia i te ra'i o te ao nei. Ua haamatahia te ohiraa o ta tatou mau tamarii no te haere e aro atu i te enemi. Eiaha tatou e ape atu, e a ore râ e tapo atu i to tatou mau mata i te mau enemi te haere mai e faa'ino i to tatou mau utuafare, a tupu ai te tama'i e i muri iho atoa hoi. Ua faaitohia te tahi pae o ratou e J. Edgar Hoover, te raatira rahi no te mutoi huna no America, a papai ai oia no nia i te ino ta te tama'i e faatae mai nei i nia i te feia apî.

E huru ihoa te reira, i roto i te mau tau peapea, mai teie ta tatou i fa-
rerei a'enei, e faatano te huru natura o te taata i nia i te huru oraraa o te
reira tau. Te vai nei te varua faaruerā o te tau tama'i, oia hoi, te feruri-
raa hape tei faatia i te paruparu o te mana'o ia ofati noa i te mau faaa-
raa a te amuirā taata ra. Ua riro te tameraa parau, i te fare haapiirā,
ei ohipa numera piti; ua pūpū te mau tamahine i to ratou viivii ore ei tu-
sia i nia i te fata haavare o te hereraa i te hau; ua haere te mau tapearaa,
i roto i te tau tama'i, no te mau vahine apī, i raro iho i te 18 matahiti, i
te faito ra e 375 no te 100 no te taiatarā, 357 no te 100 no te faatupu pea-
pea, e e 174 no te 100 no te taero ava e te faahororā i te pereoo uira a
taero ai i te ava, e te reira rahirā ua na nia ia i te faito o te tau tama'i
ore. Mo'e atura, i tei ore i tapehia e te mau haapiirā tumu, te reira mau
fanfaa e monohia'tura te reira e te papu ore i roto i te ohipa a te taata iho.
Itehia'tura te arorā tei tupu i rotopu i te tiamāraa e te haapao ore na roto
i te mau ohipa ino i ravehia ra. Riro atura te faatererā i roto i te tahi mau
utuafare ei mea paruparu e te au ore hoi.

Ia reva ana'e ta tatou mau tamarii i te arorā e iti hia ia
te taata rave ohipa. E haere te moni ohipa i nia e e rave ra-
ve rahi te mau metua vahine te tupu to ratou mana'o ia faa-
rne i te mau tamarii i te fare ia roaa ta ratou moni rahi. E
na reira ihoa te tahi mau vahine, no te mea aita'tu ta ratou
e ravea, ua faaruehia ratou e ta ratou mau tane hupehupe,
e na riro atura te utu'a no te faaamurā i te tamarii ei utu'a
na ratou. No te reira huru metua vahine e mea tia roa ia tau-
turuhia ratou e te Hau ia ore ratou ia faarue i to ratou mau
utuafare. Te taata te faafanau mai i te tamarii i roto i te ao
nei e tei faarue ia ratou na te metua vahine e faaamu e e ha-
pao, e taata faufau mau ia oia. Area te tahi pae ra, o te rave
na te mau tane i te ohipa e te vai atoa ra ta ratou tamarii
paari te tia ia tauturu mai, e mea tia roa ia haapao maitai ra-
tou i to ratou mau utuafare e ia faaherehere maitai i ta ratou
ra mau tamarii. Teie te mau parau a Herbert Hoover:

I muri a'e i to tatou faataa-maitai-raa i te mau ohipa paari papu maitai,
i muri a'e i to tatou faatirā i te mau parururā no te huirāatira, te mau
fare haapiirā, te mau fare ma'i e te mau vahi hautirā, ua riro noa ia te
reira ei tuatirā i te mau hororā, no te pae tino e te pae varua hoi te ho-

roahia mai e te metua vahineraa i roto i te utuafare ra. Eita te reira mea atoa e hopoi mai i taua here ra e te mahanahana o te aau tei riro a haamaitairaa no ô mai i te metua vahine ra.

Ia haamaitai mai te Atua i teie ohipa rahi o te Sotaita Tauturu! Ia riro ta'na mau raveraa hau ei ravea no te faaiteraa i te hui taata nei, e tei hau roa'tu, i te mau melo no te Ekalesia a Iesu Mesia e:

Te mea maitai a'e no te parururaa i te amuiraa taata ra, o te parahira utuafare ia, e tei nia iho i te utuafare i faatupu-maitai-hia te vairaa te tu'a rahi no te haamaitairaa o te taata nei. E riro te reira mau utuafare vahi faaamuraa no te mau maitai o te fetiiraa, e ia ore ana'e te utuafare faatupuhia eita atura e tia ia faatupuhia te reira mau maitai.

E au mau tuahine, ua i to'u mafatu i te mauruuru e te haamaitai ia tia noa ia outou ia rave i te ohipa rahi ta te Peropheta i haamaitai mai na outou e rave na te ao atoa nei, e itehia ta outou atoa mau raveraa i te mau vahi i fatata-roa mai ia outou. Ia ora ta outou mau Tamahine ia tia i ta ratou mau tamarii ia parau atu no ratou, mai ia outou e ia atoa hoi e tia ia tatou ia parau atu teie no to tatou mau metua vahine:

*Te feruriraa teitei roa a'e ta to'u mana'o e tia ia feruri,
Te parau teitei roa a'e te tia ia parauhia e to'u nei vaha,
Aita to ratou e faufaa no te faateitei i te i'oa
Tei hau atu i te maitai i te mau i'oa atoa ra.
Te tamarii ia tae mai to'na here i te haamataraa,
E te taata paari, ua ite au, te aifaito noa râ oia,
Te faahiti faaturatura nei au i to'na i'oa,
Te i'oa haamaitaihia o te METUA VAHINE ra.*

Te pure nei au i te Atua ia tuu mai oia i ta'na mau haamaitairaa i nia ia outou a haere atu ai outou i to outou mau fare, i nia i ta outou mau tamahine, e tei hau roa'tu, i nia i ta outou mau tamaroa mai te mea tei te atea ratou i te atoa raa'tu no to ratou fenua ai'a, e te ani nei au i te reira na to i te i'oa o Iesu Mesia ra, amene.

David O. McKay.

E RAAU FAAITOITO NO TEIE TAU.

A Faarahi ai te mau haapiiraa hape, te mau mauhaa tama'i, te mau ati e tupu nei i te mau peapea tahi-to, te haere nei te mata'u o te taata i te rahiraa e te paruparu nei to ratou mau mafatu—e te itehia nei ia vai mau ihoa te hoê raau faaitoito no to tatou nei tau. E noa'tu e eaha te tuuhia i roto i te reira raau faaitoito, ia i ihoa te reira i te faaroo—te faaroo i roto i te mau tau i mua nei, te faaroo i roto ia ratou iho, te faaroo i te Atua e i to te oraraa nei tumu rahi. E ia riro to tatou faaroo nei ei mea maitai ia tuu ia oia ia tatou i mua i teie: aita i navai te taime, i roto i te oraraa o te taata nei, no te haapeapearaa'tu no te mau mea atoa te tia ia tupu mai. No te rahi o te mau mea te tia ia tupu mai, te fifi hoi ia maiti i te fifi te tia ia haapao i te taime tano maitai, riro atura te tamataraa ia haapao i te mau peapea te tia ia tupu mai ei pereraa faufaa ore.

E teie atoa te tahi, te mau mea atoa e tupu nei, ua oioi roa to ratou tupuraa a tia'i ia tatou ia haapao atu i te reira. A mana'o noa na e tupu mai te mea tei hau roa'tu i te ino. A mana'o noa e tamata te hoê taata paari, huru nevaneva i te haapuehu i te ao nei, e tupu teie, mai ta Thomas Carlyle i parau ra: *Ia puehu noa'tu te mahana, te mau fetia atoa e teie atoa fenua nei, hoê noa iho â ia to oe poheraa.* E te tamata noa nei tatou i tana pohe otahi roa ra—e mea pinepine, i te mau mahana atoa ra, na roto i te mau ravea huru rau ra.

E teie atoa te tahi ohipa na to tatou faaroo, ia vai te ta otiaraa i roto i te mau peu a te taata tei faatiabia i te amuiraa o te maramarama e te nevanevaraa. E ao teie tei faaterehia e te ture. E eita roa te Taata faatere o te mau mea atoa ra e faatia i te taata iti nei ia faaore atu i ta'na opuaraa hopea

ra. E noa'tu i te huru e te tau o to tatou faaruerā i te orā-
raa nei, eita roa to tatou tiaturirāa mure ore e faahuru ē hia
i to'na huru, i teie nei e i te matamua hoi. E mea tia ia hae-
re noa tatou, i ō nei, na nia i to tatou e'a, i roto i to'na aro-
ha, to'na paari e ta'na opuaraa, i te vahi ta to tatou Metua
e hinaaro nei i te aratai ia tatou. E tapea noa te ite e te ma-
na o Tei hamani i te mau mea atoa ra ia haere noa ratou i to
ratou ra tereraa.

No reira, ei raau faaitoito no teie tau, a rave ana'e tatou i
te ohipa ma te haehaa mau, ma te tatarahapa i tei mo'e ra
ē te tiaturi papu i te tau i mua ra, a ite atu ai i te mea te tia
ia rave no te tapea-tamau-raa i te ao nei i to tatou nei tau-
no te mea o te vahi parahirāa, tei hau atu i te maitai, tei ite-
hia e tatou nei.

Richard L. Evans

A vaiiho e, na te taata iho e hi'opoa ia'na iho

NO te mau tumu e rave rahi ua faataa-maitai-hia te
huru o te mau taata. Noa'tu i te huru o to te taata
ta nei faataaraa ia tatou te tamau noa nei tatou i te faataa
ia tatou iho nei. E peu mau teie na te taata nei i te imi-
raa i te vahi te au ia ratou e te mau hoa hoi te au maitai ia
ratou ra. Ia vai to te taata tiamā e tapapa noa ratou i te mau
vahi e te mau hoa hoi te au ia ratou ra. Te ite nei tatou i
teie, e amui hoē ihoa te mau taata tei aifaito ta ratou mau
ohipa no te aparaurāa i te mau parau tei au ia ratou ra. Te
amui nei te taata eiā i rotopu i te mau taata eiā. Te tamata
nei te mau taata, tei aifaito to ratou au e to ratou au ore, ia

haere i te mau vahi te au maitai ia ratou ra.

Ia tia ia tatou ia maiti i tei hinaarohia e tatou ra, te haava nei ia, tatou ia tatou iho, i te mau mahana atoa ma te tia i ore i te haavaraa o te ra'i e to a muri atu ra. Te haava nei tatou, ia tatou iho, na roto i te mau hoa ta tatou e farerei nei, te mau vahi ta tatou e haere nei, te mau mana'o ta tatou e faatupu nei e te mau mea tei faaati ia tatou ra. E te feia te haapeapea ia ratou iho no nia i te haavaraa hopea ra, e noaa te tahi tufaa o te pahonora a te reira i roto i ta ratou mau raveraa, i ô nei e i teie nei hoi. Teie te parau a te hoê taata paari: *O te taata noa'tu te hinaaro ia ite e, tei te fare oia ia tae oia i te ra'i ra, e itehia ia oia i reira ia tae mai te tau.* E mea papu roa eita te taata e hau atu i te maitai, i te mau vahi au ore e te amuiraa'tu i te taata au ore, i rapae atu i te ao nei i to to'na parahiraa i ô nei ra.

E teie paha te mea te au ia ravehia e te taata nei, oia hoi, ia maiti oia e, o vai ta'na e amui atu i te oraraa nei, e i reira ia faatano oia i to'na oraraa ia maitai roa to'na parahiraa i roto i te reira amuiraa taata ra. Oia hoi, a faaoti e, ihea outou e o vai hoi ta outou i hinaaro i te amui atu, e i reira a faaitoito i te imiraa i te ravea ia tia ia outou ia parahi tamau i reira, mai ta Paulo, te Aposetolo i parau ra, **E hi'opoa malte ra te taata ia'na iho.**

NA TE FAAROO E PATOI I TE MATA'U

E Mea roa a'enei to tatou iteraa e, te mau mauhaa rarahi o te tama'i parau noa o te mata'u te haavare e te arepurepu ia. Area ia hi'o noa ra, o mua roa ia te mata'u. Mai te mea e tia ia outou ia faatupu i te mata'u i roto i te mafatu o te hoê taata, ua manuia ia outou i roto i te

faaoreraa i to'na maitai. Ua riro te mata'u ei haaparuparu no te mau nunaa e e mea papu o te reira ia te *mauhaa huna* a Satane. Area râ te vai ra te tahi mau taata te tuu mai i te parau e, aita te mata'u i riro noa ei haaparuparu—i te tahi mau taime ua riro te mata'u ei ravea, no te taata nei, no te raveraa i te tahi mau ohipa rarahi te ore roa e oti ahiri aita te mata'u. E parau mau paha te reira no te hoê taime tapi-tapi poto ra—area e pau oioi noa te puai tei noaa mai no roto mai i te mata'u e eita e tia ia faaauhia i te puai te noaa mai no roto mai i te itoitou mau.

E enemi mau te mata'u no te faaroo; o te hoa oia no te poiri e te peapea. Eita roa oia e riro ei hoa no te tiaturi; e faaineine oia i te mau mea atoa no te ino. E ma'i te reira no te feruriraa e no te varua—e taparahi e te haamou taata hoi. E ua itehia, e te mau taata'toa tei roohia e ana ra, eita roa te hau e parahi i pihai iho i te mata'u. E mea tia, i te mau u'i tei faarahihia to ratou mau mata'u, ia haamana'o ratou e, e maue ê atu te mata'u i te hoê mea tei puai atu e tei e-taeta'tu i te mata'u. Eita e tia i te mata'u ia parahi maoro i te vahi te reira te faaroo papu—te tiaturiraa i roto i te mau tau e haere mai nei, te faaroo i te Atua, te tiaturiraa i roto i te faaotiraa o ta'na mau opuaraa, te faaroo i roto i te turaraa i-te utu'a ma te parau-tia e te tiaturiraa i roto i te faaafaroraa i te mau hape i ravehia ra e ia upootia hoi te parau mau.

Ia hinaaro tatou e ia vai mau ihoa to tatou faaroo no te patoiraa'tu i te mata'u—te faaroo no te faaotiraa i ta tatou iho mau opuaraa, te faaroo no te tapearaa i te mata'u ia ore oia ia faaino i to tatou maitai. . . . *ua faaara'tura ratou ia'na, na ô atura, E te orometua, eita oe e haapao mai i to matou nei pohe? . . . Eaha outou i mata'u hua'i? eaha te mea i ore ai to outou faaroo? E i teie nei u'i tei i i te mata'u te hui faahou mai nei teie mau parau maru a to tatou Metua i te tura, A faatupua na, ia ite mai e, o vau te Atua.*

E
Ua tup
tele nei t
hehia i te

Ite 27
Peresibut
hiti. E pu

Ite 28
lani mai r
e toru, te
raa Evan
tua, i Pap
terehia i t
mauruuru

Ua tae
Pope raua
re pureraa

Tei Pue
ohipa.

O Tihati
taiea ia ra

Tei te m
ohipa Oror
i te parahi

Area o A
faa Tuamo

Ite 31
faaroo ai r
matahiti. I
i muri iho i
ma te tura
mai i to'na
mai. Te fa
tioa ra.

E PARAU APÎ NO TE FENUA NEI.

Ua tupu te ma'i puupuu i Tahiti nei, i teie mau mahana i mairi a'enei, e i teie nei te haere ra te reira i te oreraa e ua maitai te mau taata atoa tei pohehia i te ma'i.

Ite 27 no Tenuare 1951 ua pohe to tatou taeae Tinito ra o Ah Sion, e Peresibutero to'na toro'a i roto i te Ekalesia, i te 70 raa o to'na mau matahiti. E pureraa hanahana tei faaterehia no to'na tanuraa.

Ite 28 no Tenuare 1951 ua tae mai te pahi ra o Waitemata, no Niu Zelani mai no te haere atu i America. Tei nia iho i taua pahi ra na Orometua e toru, te ho'i ra i to ratou fenua ai'a no te mea ua oti ta ratou ohipa poro-raa Evanelia i taua fenua ra i Niu Zelani. Ua parahi ratou i te Fare Orometua, i Papeete nei, i taua mahana ra e poipoi noa a'e. I te pureraa tei faaterehia i taua po Sabati ra ua horoahia te mau tufaa a'oraa na ratou e ua mauruuru roa te mau taata i te mau parau maitatai ta ratou i a'o mai.

Ua tae atoa mai te parau e, ua tae maitai atu na Orometua ra o Davida Pope raua o Dick Pearce i Tubuai. E tataihia e e peni-faahou-hia te mau faa-pureraa o te Ekalesia i taua fenua ra.

Tei Pueu na Orometua ra o Paraita raua o Bob McClellan i te raveraa i te ohipa.

O Tihati Robinson Orometua raua o Bernard Larsen Orometua ra, tei Mataiea ia raua te raveraa i te ohipa.

Tei te mau Tuamotu i nia to Tihoti Hilton raua o Jay Larson raveraa i te ohipa Orometua; e mai te au i te mau parau apî tei tae mai, tei Taega raua i te parahiraa i teie nei.

Area o Aramona Orometua raua o Don Tregaskis Orometua ra, tei te tufaa Tuamotu i raro nei te raveraa i ta raua ohipa.

Ite 31 no Tenuare 1951 ua tupu te oto o te mau melo no te Ekalesia a faaroo ai ratou e ua pohe roa o Emereta â HITIAA i roto i te 20 raa o to'na matahiti. Ua tupuhia oia i te ma'i puupuu e na roto i te mau fifi tei tupu i muri iho i te reira pohe roa'tura oia. Ua faaterehia to'na pureraa hunaraa ma te tura rahi, i te mahana i muri iho, e ua rave rahi te mau taata tei tae mai i to'na ra hunaraa e ua rahi, e te nehenehe hoi, te mau tiare i afaihia mai. Te faatae atu nei te Heheuraa Apî i to'na aroha i to'na utuafare fetii atoa ra.

I te 7 no Fepuare 1951 ua faarue te pahi tira piti o te Ekalesia, o Papeete, i Papeete no te haere atu na te Tuamotu e tei nia iho ia'na te Pereteni Misioni o LeRoy MALLORY, to'na hoa o Muria MALLORY e te tahi nau taeae e te tahi nau tuahine no te Amaa no Papeete nei.

O Makatea te fenua matamua tei tapaehia e i reira ua farii-maitai-hia te mau ratere e te mau Feia faatere o te Taiete Phosphate e te mau melo atoa hoi o te Ekalesia i reira. No te rahi hoi o te ma'i puupuu i reira ua mana'ia hia'tura e, e ere i te mea tano ia faaterehia te tahi mau putuputuraa. Ua farerei-haere-hia ra te mau melo atoa o te Ekalesia e ua tuuhia'tu te mau parau no te tauturu atu ia ratou. E mea nehenehe te fare pureraa o te Ekalesia i reira.

O Ahe ia te piti o te fenua i tapaehia ra. I te taeraa o te mau ratere i te faatupuhia'tura, e te mau taata o te fenua, te tahi oro'a iti fariiraa no ratou e ua tupu roa to ratou mauauuru e to ratou oaoa no te reira.

I to te pahi faarueraa i Ahe, no te haere atu i Takaroa, haere-atoa-maira na Orometua ra o Aramona raua o Don Tregaskis, tei parahi i nia i taua mau tu ra. Ua tae atu te pahi, i Takaroa, i te mahana maa i te ahiahi roa.

I te Sabati ua faaterehia te tahi mau pureraa maitai e ua faaapihia hoi te faatereraa o te Amaa e ua maitai roa hoi to ratou parahiraa i reira.

I te 18 no Fepuare ua tae-faahou-mai ratou i Papeete nei.

E tomohia, i te mahana 1 no Mati 1951, i te oire ra i Roto Miti, te ho'e Fare Ma'i api, no te mau tamarii o te Paraimere.

Ua huru rahi te mau taata, no Tahiti nei, tei ho'i mai, na Marutea mai no te mea ua opani te hopuraa parau i reira. E parahi rii ratou i Tahiti na hou a haere faahou atu ai e hopu i te parau i Hikueru e i Takanoa atoa hoi.

E faaterehia te Amuiraa Eperera, no te Ekalesia a Iesu Mesia no te Feia Mo'a no te Mau Mahana Hopea Nei, i te mau fenua ra i TUBUAI, TAKAROA e i HIKUERU.



O vai te tia ia parau e, Ua mâ tau aau ia'u, ua tamâ varu ia'u iho i te nei hara? (Maseli 20:9)

Marcel BONNET Gérant et Imprimeur, Papeete, Tahiti.